

Sistem Ekonomi...

dianugerahkan Allah kepadanya. Nanti Allah bakal mengadakan kemudahan sesudah kesukaran” [Sūrah at-Talāq 7].

2. Sistem pengawasan¹ bersama:

Sistem pengusahaan bersama yang dianjurkan oleh Islam adalah satu konsep hidup yang paling sesuai sekali untuk dipraktikalkan oleh masyarakat. Di mana dari konsep itu manusia dapat hidup dan bekerjasama dengan aman dan damai, segala kebaikan dan faedah yang didapati dari bahan tabii dan penghasilan dapat dinikmati bersama.

Islam tidak mengharuskan sama sekali kepada sesiapa jua yang memiliki harta kekayaan untuk berenak-enak dengan kelazatan yang tiada pernah dinikmati oleh orang lain. Sedangkan jiran di sebelah mati kelaparan. Malah apa yang disuruhkan oleh Islam ialah supaya segala kesenangan dan kemudahan hendaklah dibahagi-bahagikan kepada orang lain – sama ada berupa pakaian, makanan, minuman dan lain-lain lagi – khususnya kepada kaum kerabat, jiran tetangga dan juga hamba abdi.

3. Sistem pembahagian bersama terhadap barang-barang keperluan:

Peraturan ini diletakkan di atas asas-asas keperluan yang hakiki, meskipun Islam mengakui hak-hak milik perseorangan, tetapi biarlah dari dasar yang adil, dasar yang bertimbang rasa dan bertanggungjawab di atas hak-hak orang-orang lain. Rasul

Allah ada mengatakan bahawa kaum Muslimin berkongsi dalam tiga perkara:

1. Air.
2. Api.
3. Rumput.

Mengikut riwayat lain pula ialah “garam”.

Air ialah asas bagi segala penghidupan, firman Tuhan yang bermaksud: “Kami jadikan sesuatu yang hidup daripada air”

Sūrah al-Anbiyā’ (30). Api dijadikan sebagai bahan untuk kepanasan.

Sedangkan rumput pula ialah untuk kegunaan bagi binatang pemeliharaan manusia. Dan garam suatu keperluan yang sangat-sangat dikehendaki oleh manusia. Selain daripada itu ada beberapa perkara lagi yang menjadi kepentingan bagi manusia seperti: Perubatan, pelajaran, kawalan ketenteraman umum dan sebagainya.

Sebahagian daripada konsep Sosialisme Islam ialah Islam menghapuskan segala sistem harta yang berbunga (riba), malah riba adalah satu perkara yang sangat-sangat dititik beratkan oleh Islam. Tuan punya harta tak berhak mengambil sebarang faedah dari si pemutangnya, kecuali modalnya sahaja. Kerana mengambil sesuatu faedah keuntungan dari si pemutangnya adalah merupakan riba yang paling buruk amat terkeji di sisi agama Islam.

4. Galakan dan penghormatan yang tinggi terhadap nilai-nilai kerja:

Sosialisme Islam sangat-sangat mengambil berat dan menghormati akan soal-soal kerja. Malah Islam menggalak terus manusia supaya berusaha dalam bidang apa jua asalkan suci

dan halal di sisi agama. Seorang yang pergi mencari kayu api kemudian dari harga kayu apinya itu dapat diperbelanjakan ke arah yang bermanfaat dan perlu, lebih baik baginya daripada dia datang meminta-minta dari seorang ke seorang yang lain untuk diberi atau tidak.

Firman Tuhan yang bermaksud: “Maka apabila selesai mengerjakan sembahyang; hendaklah kamu bertaburan di muka bumi dan carilah kurnia (rezeki) Allah dan ingatlah akan Allah banyak-banyak, mudah-mudahan kamu beroleh kemenangan” [Sūrah Al-Jumu‘ah:10].

Tuhan memandang kepada seseorang Hamba-Nya bukan atas kecantikan tubuh badan dan rupa parasnya, tetapi yang sebenarnya Tuhan memandang kepada nilai-nilai kerja (amalan) hasil titik peluhnya sendiri yang menjadi bahan makanan dan pakaiannya, itulah yang termulia di sisi Tuhan.

5. Memusuhi sikap melampau-lampau kebendaan:

Sebagaimana Islam membenci sifat-sifat keburukan yang lain-lain Islam juga memerangi sifat melampau-lampau dalam soal kebendaan (*material*). Tetapi tidaklah pula sampai kepada darjah kepapaan. Sifat melampau-lampau dalam soal kebendaan boleh merosakkan kepercayaan, mempertuhankan kebendaan, Tuhan telah memberi peringatan firman-Nya yang bermaksud: “Kamu telah lalai oleh kerana berlumba-lumba dengan harta benda dan anak-anak” (Sūrah at-Takāthur (1).

Dan lagi firman Tuhan: “Wahai orang-orang yang beriman. Janganlah kamu lalai (lengah) oleh kerana harta-benda dan anak-anak kamu. Daripada mengingatkan Allah (sembahyang yang lima waktu). Barangsiapa

¹ Perkataan sebenarnya adalah pengusahaan.